

Jaorverslaag v.v. De Wien 2022-2023

Jaorvergadering

Op 8 juni waas ózze jaorlikse Algemeine Lejevergadering, wao de jubilarisse Caroleyn Storm (11 jaor actief lid) en Leon Helgers (22 jaor actief lid) gehuldig woorte. John Storm (ouk 11 jaor actief lid) waas helaas neet aanwezig, maar zal op ein ander moment nog gehuldig waere. Ook woort stil gestaon beej de vertrekkende kemissieleje Ron Janssen, Ciel Steegs, Chris Hendriks en Arie van der Weiden.

Jubileumweekend

't Weekend van 23, 24 en 25 september waas gerisserveerd veur ós 5 x 11-jäärig jubileum. Op vriedaagaovend waas 't jubileumdiner. 't Team van Domani had ein fantastisch 5-gangediner bereid veur de aanwezige. Dae aovend woort muzikaal begeleid door John Marijnissen en Mad Pianos.

Zaoterdaagaovend waas eine gezellige feesaovend vól met meziek van Vital Wolter, Coen Janssen, Julia Beurskens en de PPM Band.

En op zóndaag ein gezellige receptie en aansloetend ein optraeje van de feesband Knallermann. Tegelijkertied kós de jeug zich boete ammesere met ónder mier ein springkösse, ald-Hollandse speule en ein ranjakoe.

En ter gelaegenheid van dit jubileum hebbe weej ein jubileumloeëterie met geweldige prieze georganiseerd.

Leedjesmatinee

Zóndaag 9 oktoeëber woort ós leedjesmatinee gehalde in Domani. 't Waas eine gezellige middaag wao iers ein gas alde Wienleedjes woorte gezónge, gevólg door de leedjes van ózze deelnemers. "Laef" woort 't winnende leedje, gezónge door Marc Houwen, Sandra Schattenkerk, Marion Nissen en Leon Theuws. Meziek en wäörd zien van Marc Houwen. De tweeëde plaats ging nao 't leedje "Merieke op de Franse toer" gezónge door Elise en Daisy Gaspersz. De wäörd zien van Herm Mevissen en de meziek van Hay Geritz. De derde plaats waas veur 't leedje "De waeg kwiet" gezónge door Jacqueline Derikx, Erik Erprath en Gerard Vonk. Meziek en wäörd zien van Wim Roeffen. En dan de veerde plaats veur 't leedje "Gaef ós maar die daag" gezónge door François Vervoort en John Baur. De wäörd zien van Herm Mevissen en de meziek van Hay Geritz.

Inschete

Gelökkig woort dit jaor de vastelaovend op 11 november weer traditioneel ingeschaote door de trio's van de Venlose vastelaovesvereniging op de Mert veur 't stadhoes.

Kerskiene

De zaal beej 't Jeughoes zoot weer vol beej 't Kerskiene op zaoterdaag 10 december. 't Waas weer eine aovend vol spanning, emoties en prachtige prieze!

Prinsegala

Op zaoterdaagmiddag 14 jannewari woort 't nijeje trio in 't geheim veurgesteld aan de iereleje, bestuur en Raod van Elf. 's Aoves waas 't dan intelik tied veur ózze Prinsegala. Domani zoog d'r weer fantastisch oet en ouk dit jaor ware d'r weer vuuel minse aanwezig. Vors Wienius goof inkele aanwiesinge. En dao ware zeej dan: Prins Renee I Lammen met zien adjudante Dirk van Dijk en Marcel Betzel. 't Nijeje trio woort veurzeen van alle regalia. Dao nao woort de vruikes in de bleumkes gezatte en begós de äöpeningsdans. D'r volgde eine gewéldige aovend ónder muzikale leiding van Aparty. Ouk ós eige Wienleedjes woorte gezónge en d'r ware optraejes van Patrick Pilot, Frank Donders en Duo Difference.

Vlagheise en Gulpener Hierezitting

Dit jaor waas 't vlagheise weer daags nao 't Prinsegala. Idderein waas weer fris en fruitig aanwezig beej GKM um de Wienvlag te heise en de vastelaovestied officieel te starte. 't Nijeje trio brach eure liefspreuk ten gehure, de proklamasie woort veurgelaeze en de Wien-

leedjes woorte gezónge. Nao 't vlagheise haet 't trio in de zaal eur medalje officieel oetgereik aan de aanwezige bestuurs- en kemissieleje en ald prinse. Aansloetend waas 't tied veur 't trio, raodsleje en ald prinse um te vertrekke nao Domani veur de Hierezitting met ouk deze kier weer ein good programma. D'r ware diverse optraejes van ónder mier El Magico, Berry Knapen, Eige Leweit, Poertwa en die geilen Mädeln. Nao aafloop waas d'r nog ein afterparty ónder leiding van Huub Beeren.

Joeks Tam-Tam en Familie vastelaoveskiene

Ouk veur 't nije jeugtrio waas 't dan intelik zoeë wied. Op vriedaag 20 jannewari woorte zeej oetgerope in kefee De Witte tiejes de Joeks Tam-Tam: Prins Tren I Geurts en zien adjudante Gio van de Kamp en Noud Collin! 't Waas eine gezellige aovend met diverse optraejes zoeë wie de band Waan. D'r woort gefees en gedans wies in de late äörkes.

Jeugreceptie

Op vriedaag 27 jannewari kwame diverse zustersvereniginge, familie, vrinde, bestuur, kemissies, Raod van Elf en 't groeëte trio ós jeugtrio fillisitere tiedes de receptie. D'r ware diverse optraejes van de Herfshane. 't Waas eine gezellige en drökke receptie en nao aafloop waas 't nog lang gezellig beej Kefee De Witte.

H. Mis en groeëte receptie op zóndaag 29 jannewari

Alleriers waas 't neteurlik tied veur ózze traditionele vastelaovesmis in de Familiekerk ónder leiding van Daeke Spee. 't Waas ein prachtige vastelaovesmis met zang van onder mier Julia Beurskens, Marlie Hanraths, Jacqueline Derikx, Erik Erprath, Gerard Vonk en ózze eige Ald Prinse. Nao aafloop van de mis vertrok 't gezelschap nao Domani wao um twieë oor de groeëte receptie begós. 't Waas ein zier drökke en lange receptie met ein kómme en gaon van vereniginge, familie en bekinde van 't trio.

Op zóndaag 5 fibberwari woorte de recepties bezóch van Jocus, de Vogelhut en de Gaaskaetel.

Prónkzitting op 10 fibberwari

De Prónkzitting is ós jaarlikse evenement met meziek, joeks en jen. D'r ware optraejes van ós eige Wienleedjes, Björn en Mieke, Har Daniëls, Eige Leweit, Marjolein Heijltjes en as aafsloting Tiroler Teufel! En neteurlik kwaam 't Jocus-dreejspan Prins Gijs I Hendrikx met zien adjudante Martijn Hendrikx en Sef Smeets ein bezeuk bringe aan ós trio. 't Waas ein fantastische Prónkzitting en eine gezellige aovend.

Daags nao de Prónkzitting hadde 't trio en de Raod van Elf diverse verplichtinge. Alleriers d'n optóch van de 3-Kes en 't oetrope van de groeët Venlose Nar. Vervólges 't make van de prinsefoto van Groeët Venlo en 's aoves de receptie van de Törvers. Helaas dit jaor neet nao de zitting van 't Roeëje Krutz.

Zóndaag 12 fibberwari waas idderein al weer vruueg beej GKM veur d'n Blierickse daag. Vanoet GKM ging 't ganse gezelschap met de bus nao 't hoes van d'n Hoeëgheid Renee ónder begeleiding van Joekskepel Dreej Daag Um. Nao ein wäördje door Vors Wienius en d'n Hoeëgheid, woort idderein binne veurzeen van kóffie, vlaai, soep, werm vleis, bruedjes en drinke. Van dao oet vertrók 't gezelschap te voet en met de bus nao de recepties van de Wortelepín, de Vaegers en de Moeraskwaakers.

Op maondaag nao d'n Blierickse daag ginge Raod van Elf en trio, zoeë wie idder jaor, nao 't Fortissimo-konzert in de Maaspoort.

't Wings-bal

Op dónderdaagaovend veur de vastelaovend hebbe Raod van Elf en trio 't Wingsbal en de receptie van eur prinses Sofie bezóch.

Schoeëiendaag / Muts van d'n Bluts

Op vriedaag 17 fibberwari brachte 't trio en inkele raodsleje ein bezeuk aan diverse schoeële en de Vastelaoves Top 555 op de Parade. 's Aoves ging 't gezelschap nog nao de letste receptie van 't seizoen beej De Kwas. Muts van d'n Bluts waas ouk dit jaor beej de Alde Mert wao rónnd de klok van 22.30 oor d'n tied waas gekómme um de mutse van de Raod van Elf en 't trio officieel aaf te zette.

Op vastelaoveszónndaag verzamelde vuuel Wien-leje zich beej de Alde Mert veur 't aaftraeje van ós Jeugtrio. Dao woort op fantastische wies aafscheid genaome van ós jeugtrio in samewerking met Jocus Toekóms.

Weej kinne weer truuk kieke op ein geweldig vastelaovesseizoen, wao De Wien zich absoluut van ziene beste kant haet laote zeen.

Wienböl en Wienbölkes; hertelik dank veur alles!

Sikkertaris,
Corina Zanders

Veurzitter,
Ed Faessen